

ՏԵՐՏԵՐ.– Եւ եղիցի՛,

ԲՈԼՈՐԸ.– Ամեն:

ՆԱԶԻՐ.– Ստուեր աստուծու: Երջանիկ միտք է ծագել արքայական գլխիդ մէջ: Հրամայիր կատարենք:

ՆԱԶԱՐ.– Հիմի ես հրամանք եմ անում թագաւորական: Գնացէ՛ք Նոր զօրք կապեցէ՛ք եւ հրաման տուէ՛ք իմ կողմից, որ գնա ողջ աշխարհքի վրայ, թալանի ու բերի ինձ: Ժողովորդին էլ հրամանք, որ Նոր հարկեր տա: Իմացա՛ք:

ԲՈԼՈՐԸ.– Իմացանք, թագաւոր սուրբ:

ՆԱԶԻՐ.– Ղոռոբուղա, իմացա՛ր:

ՂՈՌՈՐԲՈՒՂԱ.– Հա՛մմմ, իմացա, թագաւոր,

ՆԱԶԱՐ.– Այ գահրումա՛ր քեզ, քար ու քացա՛խ: Բաղցրացրու ձենդ, էլի՛, դու էլ: Չեղաւ, որ մի քաղաքավարութիւն սովորեցնեմ: Հայվա՛ն: (Տէրտէրին) Հոգեւոր տէր, դու էլ գնա, հոգեւոր դասը առ ու խաչնաչվառով արի ինձ եկեղեցի տար: Աղօթք պիտի անեմ աշխարհքի փրկութեան համար: (Բռլորին) Դե, հիմի հայդէ, թագաւորական խորհուրդ ունիմ կնկանս հետ:

ԲՈԼՈՐԸ.– Աստուած պահէ թագաւորին: (Գնում են, բացի նազիր-վեզիրից:)

ՄՈՒՆԵՏԻԿ.– (Դրսից) Պատերա՛հա՛գմ... (Աղմուկ է լսում, որին հետեւում է դիւլ-գուռնայի ձայնը:)

ՆԱԶԻՐ.– (Դուրս է գնում ներքեւի պատշգամբը:) Լսեցէ՛ք, ո՛վ զօրք ու ժողովուրդ: Մեր ազատարար եւ սուրբ թագաւորը բազմաթիւ թշնամիներից մեր երկիրը ազատելուց յետոյ, աստուածային սուրբ Հոգու զօրութեամբ, վեր է կենում ազատելու ամբողջ աշխարհը անարժան թագաւորներից: Խստագոյն հրաման է, որ ժողովուրդը հարկ տայ եւ զօրքը գնա տիրի ամբողջ աշխարհքին: Յաջողութիւն թագաւորին եւ յաղթութիւն ձեզ:

ԶՕՐՔ ԵՒ ԺՈՂՈՎՈՒՐԴ.– (Դրսից) Կեցցե՛ մեր քաջ թագաւորը: (Ռազմի փողեր, երգ, գուռնա, զէնքի շառաչ, որ հեռանում է:)

ՍԵՆԵԿԱՊԵՏ.– (Ներս մտնելով) Ժպի՛տ հիւրընկալութեան, թագուհին բարեհաճում է ընդունուելու:

ՆԱԶԱՐ.– Հը՞:

ՍԵՆԵԿԱՊԵՏ.– Թագուհին գալիս է: